

Das fünffzähend Capittel.

Wenn du zu einer Statt oder an ein ander ort messen
wölest/ vnd du kein ebne zu deinem Stand
nemen kanst.

So thu jm also/ such zwö gelegenheiten auff zweyen büchle/
oder Bergen zu deinen zweyen stenden/ da du sähen magst
das ort so du begerst zumassen/ vnd steck ein spieß oder stan-
gen auff 16. Schuch vber die erden grad auffrecht/ vnd gang auff
den anderen büchel oder Berg/ vnd steck den stecken mit dem steffe
in die Erden/ vñ strub das Instrument nähen zuhin an den steckē/
vnd fehr die Standregel mit dem buchstaben B. gegen dem spieß
vnden daran/ vñ strub das Instrument vest dz es sich nit verruck/
demnach ruck die regel mit dem buchstaben D. auffrecht in den sen-
ckel/ demnach leg die regel mit dem absähen vnd buchstaben G. in
die Standregel C. bey dem puncten da 100. ist/ vnd ruck die regel
nach der höche des spieß/ vnd sich in der auffrächten Regel/ was
für ein zal abschneyde/ so findest du 8. puncten/ so zell auff der stand-
regel vom A. gegen dem C. vnd sprich/ wo 8. ist/ für 16. vnd also
durch auß/ so hast du von einem büchel zum anderen 200. schuch/
demnach strub das Instrument ab dem stecken/ vnd strub es nach
der fläche auff den stecken/ vnd richt die standregel mit dem buch-
staben B. gegen dem spieß/ vnd strub es vest/ das sich nit verruck/
darnach ruck die regel mit dem D. an dz ort da du begerst zu wissen
wie weyt es ist/ vnd merck die zahl auff der halbrüden scheyben E.
vnd mach ein pünctli in das wachs/ demnach nimb das Instru-
ment mit sampt dem Stäcken/ vnd steck ein ander gemerck dahin
das du es bey dem anderen Stand auch sehen magst / vñnd gang
auff den anderen Büchel/ vnd nimb den Spieß hinweg/ vnd steck
den stecken mit dem steffe darein/ vñnd strub das Instrument dar.

D. iij.